

Kleine dingen, inval, te cu busje komt zo

Dos dia pasa mi a lesa un remitido di hefe di douane na Corsow, contestando un remitente y na mes momento el a gradici e remitente pa e informacion y comentario.

E hefe a laga sa di no tabata sa di e problema presenta cu cobramiento di belasting riba un shimis di bruid na aeropuerto.

E turista a bin casa na Corsow y a haye ta paga belasting na aeropuerto, pasobra el a drenta cu su shimis den cual e ta bay casa. Un dolor di cabez el a pasa aden pa por a sali cu su shimis atrobe y pa haya su placa bek.

E regulacionnan rond di e tipo di casonan aki a habri wowo di e hefe cu lo percura pa bin cambio.

Lesando esaki mi a puntra mi mes: **Cuanto hefe di departamento na Aruba ta lesa corant, lesa kehonan, comentarionan di ciudadanonan ? Cuanto politico , parlamentario y ministro ta lesa e cosnan aki?**

Ta parece cu na Aruba ta locual ta beneficia nan so, nan ta atende y den hopi caso djis pa bin den publicidad.

Awendia mi ta ripara cuanto politico tin cu ta bini den publicidad casi tur dia cu topiconan djis pa bisa cu nan a mishi cune y pa nan number y potret wordo publica.

Pero accion pa drecha e situacion bo no ta mira.

SOPI Y STOBA DI CHUBATON

Pasando na Paradera mi a mira e **cabritonan** y e cantidad di **chubato** cu mi ta yama **chubaton** pa e grandi cu nan ta y e cacho gigantesco cu tin riba nan cabez.

E prome grupo a pasa mi dilanti saliendo loco loco for di un parti habita, —sigur crusando den tereno di hende.

Te diarazon mainta ainda mi a lesa un keho cu a drenta di un habitante di **Paradera** riba esaki. **E di tanto keho.**

E di tanto keho cu ta wordo publica y no tin un persona ni instancia pa saca un man.

Habitantenan no sa kico pa haci mas.

Nan no sa unda pa keha mas.

Tin habitante cu a dicidi di sconde auto bao di mata di kwihi pero e cabrito y chubatonan aki a dicidi di subi hasta riba e auto bao di mata di kwihi y con cu trata na core cu nan, nan no ta move..

Auto si ta keda tur rasca, mas di locual el a keda rasca caba staciona otro caminda. Hasta cacho nan ta hinca den auto.

Habitantenan ta keha di matanan cu ta wordo kibra den cura pasobra e cabritonan y chubatonan ta drenta, bula cura, destrui y no por haci nada.

Tin cu a pone waya rond di nan matanan y esakinan no a dura mucho prome cu nan a wordo kibra y comi.

Kehonan ta muestra cu nan ta fada di denuncia e casonan na polis pasobra nada ta pasa.

Polis ta bisa di no por haci nada.

Nan no por mata e cabritonan ni chubatonnan pa **fin di siman tene BBQ combina cu sopi cabrito y bon stoba acerca**, pasobra e ora ey si **doño y polis ta sali riba nan mes ora.**

Nan no ta haya ni tempo pa **invita e cabritonan y chubatonan pa un bishita mas pa otro actividad culinario di recaudacion di fondo pa daño causa.**

Nan ta pidi autoridadnan auxilio pa trece tranquilidad den e barío y na nan cas.

3 LUNA DI SUSHEDAD TAMBE

Tin tambe na **Paradera** e 3 luna di sushedad tira unda antes tabata consultorio di docter.

Habitantenan a fada di yama polis , Dow y busca polis di barío via number cu no ta cuadra duna di parti polis.

Tres luna pasa a cap mata di kwihi banda di e ex consultorio aki y tur cos a wordo tira un banda y nunca mas a pasa piki e sushedadnan

aki.

A yama polis y e contesta tabata pa tuma contacto cu polis di barío, pero e numbernan duna nunca a cuadra.

Esakinan ta kehonan” **chikito**” pero den nos comunidad ta kehonan chikito di habitantenan ta loke nan kier mira resolvi.

Ta como si fuera cu esnan cu mester atende cu “**Departamento di Keho Chikito**” ta den e unico departamento caminda no tin “**lesamento di corant**” henter dia, manera sa tilda ambtenaarnan den tur sorto di chasco.

INVAL CERCA “LA ZORA”

Ayera polis a haci un “inval” na **Foxy Lady**..

Hoeraa, nan a traha riba un di e tantisimo kehonan cu tabata tin..

Pero aki ta trata di solamente un di e tantisimo sucedidonan cu tin na e cantinan cu ta cosnan cu ta “**hole bestia morto**”.

Ta papia di hasta “**instituto ilegal di duna fianza**” di gerencia y trahadornan cu den exterior ta conoci como “**shonnan di placa**” na Aruba debi na nan propiedadnan etc. aki y aya.

Loke bo kier cumpra bo ta haya.

Ta ponemi corda riba e denuncia haci 3 luna pasa di un comerciante na Playa relaciona cu ladronia di mas di 50 mil den su negoshi.

A duna number y tur dato di esun presuntamente culpabel.

Despues di 2 luna ainda no a traha riba e caso y 3 luna a pasa y den e “**continente mundial cu yama Aruba**”, cu ta e continente mas grandi cu resto di mundo, ainda nan no por pone man riba e señora pasobra “**e nunca ta na cas**”.

E cos chikitonan aki ta loke ta come stoma di ciudadanonan y duna nan ulcera.

E DIALOGO A-SOCIAL Y BUSJE KOMT ZO

E dianan aki ta lesa y scucha di e **Dialogo Social**.

Pa mi e tabata y ainda ta e **cumbre a-social**.

Ta tres gremio ta sinta discuti riba locual ta considera “**social**.”

Ta gobierno, sindicatonan y gremio empresarial.

Mi no a mira ningun di e fundacionnan cu ta traha riba tereno social den e “**get together**” aki.

A papia di fondonan cu a desaparece, tarifanan di AZV y di docternan y specialistanan, di placa perdi di pension y ta tende cu ta e ciudadano mes ta responsable pa su mes y kico e contribui e ta haya.

E asina yama “**leynan di selva**” cu ta hiba e ciudadano den e direccion aki.

Pa colmo, entre e sindicatonan mes tin malcontento ta reina y di resultado, nos por wel di lubida.

AZV nunca lo baha tarifa cu nan ta cobra, docternan nunca lo wordo obliga pa baha tarifa, ni e specialistanan.

Lo no bini cambio den asuntonan cu tin di haber cu salubridad ni den asunto di pension.

Pakico, pasobra no tin hende pa pone presion “**a lo macho**” y ora cu docternan, specialistanan y grandinan rabia pone pia abao cu menaza di bay corte etc. tur “**macho**” lo bay atras “**manera cangreu**”.

President di sindicato di polis a usa e frase di “**hiba awa pa lama**”, lubidando di bisa acerca “**cu un hemchi yen di buraco**”.

Esaki ta mescos cu e popular “**Busje komt zo**”.

Di tempo cu a cuminsa usa e frase aki, mi a bisa cu dia mi mira algo sosode, mi ta kere cu lo tin un “**busje komt zo**”.

Te awe Aruba ta sperando riba e bus aki.

A bini varios masha bunita for di **China**.

Nos a conoce e busjenan di **Brasil** tambe, pero e “**Busje komt zo**” te ainda no a wordo construi na ningun fabrica.

Pa colmo tur fabrica di bus ta sufriendo di e asina yama “**crisis mundial**”.

Juby Naar.